



Affons da famiglias svizas en l'exteriur

Ina grupp dals 300 uffants svizzers da l'exteriur vegn questa stad a Vignogn en Val Lumnezia.

6



Novs radars meteorologics

MeteoSvizra ha prendì en funcziun in radar meteorologic sin la Pointe de la Plaine Morte.

11

DIE SÜDOSTSCHWEIZ

LA QUOTIDIANA

Redacziun: Via comerciala 22, 7007 Cuiria, tel. 081 920 07 10, fax 081 920 07 15

La cultura dalla protecziun dalla patria

■ (anr/hh) Avon biebin tschien onns ei l'Uniuin grischuna per la protecziun dalla patria vegnida fundada. La finamira: Salvar las vertids dils antenats ed ils simbols dalla historia svizra.

Simon Bundi ch'ei carschius si a Cuera e Zignau ha dau la gievgia sera ella Casa de Mont a Laax in sguard ella historia dalla protecziun dalla patria ils onns 1850 entochen l'Emprema uia mundiala. En quei temps ei l'uniun grischuna vegnida fundada. Alla testa da quella eran oravontut reformai. Lur intenziun era da cumbatter il modern. Fuormas e materials da baghegiar stuevan ir a prau cun la cultura e la cuntrada. Aunc oz dattan biars exempels perdetga da quei engaschi dall'Uniuin grischuna per la protecziun dalla patria, denter auter baghetgs allas staziuns, punts ni era centralas d'ovras electricas. Ina impurtonta rolla giugava en quei connex era la promoziun dils costumes vegls. Naschida ei en quei temps denton era ina nova identitad cul romontsch.

> PAGINA 3



Jörg Kindschi è sa disgrazià

■ (rtr) Il mastral dal circuit da Suot Tasna, Jörg Kindschi da Ftan, è mort. Sco quai che la polizia chantunala ha confermà è Kindschi sa disgrazià durant ina tura al «Chlein Schwarzhorn» sur Tavau. El saja glischnà or enten montar ses skis da tura e crudà radund 250 meters sur naiv e crap-pa giu. El saja mort anc al lieu d'accident.

Jörg Kindschi, che ha gè 60 onns, è sper esser stà mastral dal circuit da Suot Tasna era stà president da la Partida burgais-democratica da l'Engiadina Bassa/Val Val Müstair e suprastant communal da Ftan.

Servetsch d'abunents e da distribuziun: tel. 0844 226 226 mail: abo@somedia.ch



Sursilvan alla testa dils catschadurs

Robert Brunold da Sursaissa surpren il presidi dall'Uniuin cantunala dils catschadurs da patenta

DA HANS HUONDER / ANR

■ Robert Brunold da Sursaissa ei niev president dall'Uniuin cantunala dils catschadurs da patenta dil Grischun. Delegadas e delegai han tscharniu il Sursilvan la sonda a Tavau sco successur da Beat Angerer.

Cun Robert Brunold semetta in catschadur fetg engaschau alla testa dall'uniun cantunala. El ei buca mo staus president dalla Secziun da catschadurs Sursaissa e dalla reuniun dallas secziuns da catschadurs dalla Surselva, mo-bein era commember dalla suprastanza gronda dall'uniun cantunala. Dapi 24 onns rimna el experientschas en differents gremis dalla catscha. En in'intervista cun l'Agentura da novitads rumantscha s'exprima Robert Brunold davart differents secturs che davant il mument la catscha. Denter auter ei quei l'iniziativa encunter la catscha d'atun. «Per mei va quella memia lunsch e per quei motiv refusel jeu ella detschartamein», puntuescha il niev president cantunal. Concernent il retuorn dils animals da rapina gronds sutastreha el sia posiziun retenida: «Il mument ein ils animals da



Il niev president dall'Uniuin cantunala dils catschadurs da patenta dil Grischun, Robert Brunold (amiez), ensemen cun il president dalla regenza, cusseglier guvernativ Mario Cavigelli (sen.), ed il cau digl Uffici da catscha e pesca dil Grischun, Georg Brosi.

FOTO H. HUONDER

rapina gronds buc ina concorrenza per la catscha. Probablamein vegn ei denton a vegnir il mument che nus stuein regular quels animals per impedir me-

mia gronds donnos el puresser ed ellas populaziuns da tscharvas, cavreuls e camutschs.» Ina dallas empremas finamiras dalla suprastanza centrala ei l'installaziun

d'in secretariat. Quel duei descargar la suprastanza da lavur administrativa.

> PAGINAS 2 E 3

COMMENTARI

In clar verdict

DA HANS HUONDER / ANR

La sonda ei l'Uniuin cantunala dils catschadurs da patenta s'exprimida davart l'iniziativa encunter la catscha d'atun. La parola ei clara: Cun rodund 95 per-tschien dallas vuschs han las delegadas ed ils delegai spediù quella iniziativa dall'aua giu. Quei ei denton mo l'entschatta d'in cumbat che savess daventar fetg dir ed oravontut emoziunals. Cundiziun persuenter ei che l'iniziativa seigi insumma valeivla e vegni la fin finala sutta-messa al pievel per votaziun.

Ch'ins astga exprimer libramein igl agen meini e ch'ins ha il dretg da lantschar ina iniziativa ei gie nuot auter che legitim e democratic. Ch'els iniziants ni silmeins quels paucs che han susteniu la sonda l'iniziativa ein buca s'exprimi alla radunanza ed han aschia munchentau la caschun da defender lur pre-tensiuns procura per ina gronda enzenza da damonda. Schegie che las secziuns havevan fatg lur meinis havevessen ils iniziants tonaton giu la pusseivladad da far paleis lur pugn da vesta. In dialog constructiv davart la catscha d'atun füss staus indicaus. Sto esser che las frontas denter ils adherents ed ils adversaris dall'iniziativa ein talmein endiridas ch'ina discussiun ei buca pli pusseivla.

Sh'els catschadurs vulan defender a liunga vesta cun success la catscha han els negina autra letga che da s'unir. Nuot periclitessa pli fetg la catscha che meinis dividi ni – sco igl ei era vegniu pretendiu la sonda – nunverdads per defender per tut prezi igl agen meini. In meini spartiu anovians ei auas sils mulins dils adversaris dalla catscha e procura per confusiun ella populaziun. Enstagl d'impunder las forzas per dispetas fagess ei mer da basegns da sepopilar cun buns exempels. Numerus catschadurs ein numnadamein buca mo activs igl atun duront la catscha, mo-bein era igl ulteriuir temps enten prestar lavur en favur dil spazi da viver dalla selvaschina.

anr.huonder@bluewin.ch

Flauta magica: Produzioni impreschiunanta

■ (anr/bcs) Venderdi passà ha gnü lö aint la caverna da las Ouvras electricas d'Engiadina a Martina üna produziun da La flauta magica da W. A. Mozart. Las scoulas dals cumüns da Scuol, Ftan e Valsot insembel cun lur magistras e magisters, cun ün cor da creschüts ed instrumentalis han satisfat. Tuot la produziun cun 230 scolaras e scolaris portai-

va la scrittüra da Roberto Donchi, il manader da la Scoula da musica Engiadina Bassa/Val Müstair. Dirigida e manada es gnüda la produziun da Peter Appenzeller insembel cun la magistra Katharina Mayer. S-chars 700 audituras ed auditurs han passantà a Martina üna saira inschmanchabla.

> PAGINA 7



Bels costumes han dat a la produziun ün bel colorit.

FOTO B. STECHER

Bieraria Tschlin cun meglder rendaquint

■ (anr/bcs) Sonda passada ha gnü lö aint la sala polivalenta da Tschlin la 10avla radunanza ordinaria da la Bieraria Tschlin. Il president dal cussagl administrativ, Berthold Ketterer, ha pudü rapportar d'ün on satisfacent cun ün s-chavd dad 89 000 francs. Il manader da gestiun, Reto Rauch, ha infuormà ils preschaints davart il quint chi nun es amo sco

giavüschà, pero bainquant plü allegraivel sco quel da l'on avant. La radunanza ha approvà il quint e dat dis-charg als organs respunsabels. In pè da Ketterer chi ha demischionà sün la radunanza es gnü elet Andrea Gilli da Zuoz sainza cuntravuschs e cun grond applaus.

> PAGINA 7



Mincha acziunari ha survgni üna biera da giubileum.

FOTO B. STECHER

«Nus lein sensibilisar la populaziun pils fatgs da catscha»

Robert Brunold ei vegnius eligius la sonda sco niev president dall'Uniun cantunala dils catschadurs da patenta dil Grischun

CUN ROBERT BRUNOLD
HA HANS HUONDER / ANR DISCURRIU

■ La sonda ei Robert Brunold da Sursaiusa vegnius eligius a Tavau sco niev president dall'Uniun cantunala dils catschadurs da patenta dil Grischun. El succeda a Beat Angerer da Tavau. Il niev president ha denter auter l'incarica da realisar differentas incumbensas stipuladas els statuts novs, sco per exempel l'installaziun d'in secretariat. L'iniziativa encounter la catscha d'atun refusa el detaschar-tamein e pertuccont ils animals da rapina gronda ha el ina posiziun reteni-da.

Robert Brunold, tgei munta il presidi dall'Uniun cantunala dils catschadurs da patenta dil Grischun per Vos persunalmein?



Robert Brunold ha surpriu la sonda vargada il presidi dall'Uniun cantunala dils catschadurs da patenta dil Grischun.

FOTO H. HUONDER

Robert Brunold: Jeu sundel semess a disposiziun per quella incumbensa da mai ch'jeu appartegnel dapi igl onn 1990 regularmein a gremis che sefatschantan dalla catscha, seigi la secziun, il district ni la regiun. Era egl avegnir less jeu s'engaschar en favur dalla catscha ed oravontut per il manteniment e la cuntinuaziun dalla catscha da patenta.

Tgei ei special vid il presidi dall'uniun cantunala en cumparegliaziun cun ils auters gremis sco per exempel dalla secziun ni la regiun?

En emprema lingia ei quei segiramein la grondezia dall'uniun. Ella cumpiegia gie tuttas secziuns da catschadurs. Quei ei segiramein la gronda differenza e vul dir ch'ei detti cheu aunc dapli meisins che per exempel en ina secziun.

Tgei vul quei dir, menar ina tala gronda uniun cun rodund 5500 activists e biars passivs, surtut era pertuccont il temps ch'ei d'impunder?

Quei ei grev da giudicar. Segir e franc absorbeschan las representaziuns fetg bia temps. En quei connex tracta ei en emprema lingia dalla preschientscha a biaras occurrenzas ni era sedutas. Biars gremis spetgan la preschientscha dil president cantunal. Dil temps anora ei quei buca cumparegliabel cun in presidi en ina secziun ni tier la regiun. Sin fundament dallas experientschas che mes antecessurs han fatg ei quei ella media silmeins ina occurrenza ni seduta per jamna.

Cun excepziun dil president dalla cummissiun da tgira, Hansruedi Andreoli, consista la suprastanza centrala cumpleinamein da novs commembers. Tgei vul quei dir pil president?

Igl ei segiramein ina schanza. Denter quels collegas sesanflan era persunas cun gronda experientscha sil sectur dalle structuradas e l'organisaziun dalla catscha el cantun Grischun. Jeu patratgel per exempel vid Noldi Tiri ch'ei niev capotiradur. El ha gronda experientscha. Segir e franc ein denter quels era persunas cun dameins experientscha, mo quei ei segiramein era ina schanza da veser ina caussa ni l'otra cun auters egl. La situaziun che seprenta uss a nus ei en sesez usitada, pertgei cun la midada dil president ha ei era adina dau ina midada cumpleina dalla suprastanza centrala. Cun Hansruedi Andreoli havein nus il cletg che silmeins in resta.

Cun ils statuts novs seporscha alla suprastanza centrala era la caschun d'installar in secretariat. Quei ei in basegn che vegn exprimius dapi onns. En tgei fuorma vegn la suprastanza centrala a realisar quei post?

Ils statuts novs van en vigur cun questa radunonza da delegai. La realisaziun dil secretariat stat en cumpetenza dalla suprastanza centrala. Per igl emprendem mezz onn havein nus in budget approbau per quei post da 25 000 francs. Silsuenter ei quei 50 000 francs per onn. Sin fundament da quella indemnisaziun ei quei segiramein buc ina piazza cumpleina. L'idea ei d'integrar quella funcziun en ina fatschenta per aschia haver da tut temps ina persuna da contact. Ella nova suprastanza havein nus discutat quei e l'idea ei d'endrizzar il secretariat cheu en miu biro fiduziari. Ei fa segiramein senn da plazzar il secretariat ella vischinonza dil president.

Tgei incumbensas vegn quei secretariat ad haver?

En emprema lingia vegn el a descargar ils commembers dalla suprastanza centrala da lavur administrativa. En special sectracta ei en quei connex dalla contabilitad e la lavur da mutaziuns. La finamira ei da dar allas commembras ed als commembers dalla suprastanza centrala dapli spazi per representaziuns sco per exempel per la lavur publica ni era politica. Entochen uss eran silmeins duas persunas bloccadas cun lavur administrativa. Essend che tuts fan quei el temps liber ei il spazi persunter limitaus.

Ils davos onns ha l'uniun fatg gronds sforzs era sil sectur dalla scolaziun. Uss ein las structuradas purificadas. Nua exista aunc potenzial da reme-dura?

Tenor miu manegiar ei quei segiramein necessari sil sectur dalla lavur publica. Nus stuein ir pli savens ella publicitad, pertgei era el cantun Grischun vegn la catscha messa pli e pli en damonda. Igl ei segiramein la finamira d'informar aunc meglier la populaziun davart la funcziun dalla catscha. Quei vegn segiramein ad esser ina dallas incumbensas principalas dalla suprastanza centrala nova. Mirau sur tut ora lein nus cuntinuar cun la lavur da nos antecessurs. Ei vegn lu a semussar schebein ei drova aunc autras correcturas ni amplificaziuns da nies engaschi.

Ils statuts novs reglan era la representanza territoriala ella suprastanza gronda. Con cuntents essas Vos cun la realisaziun dils districts?

La basa dall'uniun cantunala ei organisada meglier aschia. Era ei la representanza regionala ella suprastanza gronda garantida cheutras. Sch'ils districts funcziunan endretg sa la basa dils catschadurs vegnir tschaffada meglier. Il fundament persunter ei da disponer da buna gliעד.

La catscha da patenta ei ina gronda tradiziun el cantun Grischun. Fuss ina catscha da revier era pusseivla tier nus?

En sesez saiel jeu buca s'imaginar quei. La catscha grischuna libra s'auda semplamein tiel cantun Grischun. L'introducziun d'ina catscha da revier procurass per ina revoluziun. Nus havein mussau ch'ina catscha da patenta funcziuna fetg bein. Per la catscha da patenta plaidda era in cuort, mo intensiv temps da catscha. Mintgin che dispo-na dalla patenta sa ir a catscha leu nua ch'el vul. El sa ir a catsch'aulta ni catscha bassa, gest sco el vul. Per quei motiv ei ina catscha da revier negin tema tenor miu manegiar.

L'iniziativa encounter la catscha d'atun ei sin meisa. Tgei posiziun haveis Vos enviers quella?

Per mei va quella iniziativa bia memia lunsch e per quei motiv sundel jeu deschartamein encounter ella. Quei ei buca la dretga soluziun. Entochen ussa ha il comite d'iniziativa purtau neginas propostas concretas co la catscha duess vegnir exequida sin fundament dall'iniziativa.

Ha quella iniziativa spartiu ils catschadurs?

Jeu creiel buca ch'ella hagi spartiu ils catschadurs. En biars discors cun catschadurs che han suttascret l'iniziativa ei semussau ch'els han fatg quei per dar in accent. Forsa era per dar ina agl uffeci. Jeu creiel che biars catschadurs che han suttascret ella vegnan buca a votar la fin finala per l'iniziativa. Tenor miu manegiar vegnan ils cunterarguments a perschua-der ils biars.

Con credit deis Vos a quella iniziativa tier il pievel?

Quei ei fetg grev da dir. Cun ina buna informaziun – forsia era en collaboraziun cun il forestalesser e l'agricultura – duess ei reussir da procurar ch'ella vegni refusada. Igl ei denton da supponer ch'ei vegni operau el combat da votaziun cun biaras emozions e forsia era cun arguments buca dil fatg.

Tgei schabegia, sch'ei dat tonaton in gie?

Lu vegnin nus ad haver in problem e stuein empruar da realisar l'iniziativa. Sch'ella vegn denton acceptada sto il comite d'iniziativa vegnir cun propostas concretas co realisar las preten-siuns. Lu ston ils iniziants surprender responsablada.

Dess ei tonaton buc autras pusseivla-

dads d'exequir la catscha d'atun, respectivamein la casch'aulta?

Tenor miu manegiar stuein nus spitar ussa sin ils resultats dallas mesiras specialas pridas en quei connex. Jeu patratgel per exempel vid las acziuns da disturbar las tscharvas els asils ni era las pusseivladads d'arver quels parzialmein. Ei drova denton enzacons onns avon che nus sappien giudicar schebein quel-las mesiras ein bunas ni buc e schebein ellas ein persistentas. Sin fundament da quels resultats sto vegnir giudicau sche-bein ulteriuras mesiras ein necessarias.

En auters cantuns han iniziativas pretendiu restricziuns ni schizun scamonds dalla catscha. Con bein ei la catscha insumma aunc francada ella populaziun grischuna?

Jeu creiel ch'ei fussi falliu da dramatisar la situaziun, pertgei quellas iniziativas ein vegnidadas refusadas. Igl ei facticamein aschia che la catscha ei dispiteivla. Ei fa segiramein senn d'esser precauts, pertgei ei dat adina dapli vuschs criticas enviers la catscha. Fetg problematic eis ei naturalmein lu, cura ch'ils catschadurs nezegian la publicitad per lur cumbats interns. El cantun Grischun ei la catscha francada bein enteifer la populaziun.

Tgei posiziun ha l'Uniun cantunala dils catschadurs da patenta dil Grischun concernent la tematica davart ils animals da rapina gronds?

Avon entgens onns ha l'uniun cantunala publicau ina resoluziun. Tenor quella accepta ella ils animals ch'arrivan a moda naturala. Ella ei denton encounter animals che vegnan mess ora. Enzacu stuein nus denton tschentat per lur cumbats con gronds ch'il diember da quels animals astga esser en in singul territori. Jeu creiel che nus vegnien enzacu a stuer regular era quellas populaziuns d'animals.

Nua ei quei cunfin alla regulaziun?

Quei ei secapescha fetg grev da dir. Il mument havein nus memia pintga experientscha sin quei sectur. Quei vegn ad esser il cass probablamein cura ch'ils donns caschunai entras quels animals daventant insupportabels, seigi tier l'agricultura ni ellas populaziuns dils animals selvadis.

Ils purs ein buca ventireivels cun quels animals, co ei la situaziun tier ils catschadurs?

Tier ils catschadurs eis ei segiramein pli ruasseivel. Empau auter eis ei forsia leu nua ch'ils lufs vivan permanentamein il mument, sco per exempel el territori dil Calanda. Sch'ins va secapescha a

catscha leu nua ch'ei ha buca lufs ei la situaziun vinavon sco pli baul. Auter ei quei denton en tschels loghens. Quei che nus havein constatau ei ch'il diember d'animals curdai ei sereducius leu nua ch'ei ha lufs. Quei ei segiramein positiv. En quels territoris eis ei segiramein pli grev da far catscha, pertgei la selvaschina ei pli attenta. Il diember dils animals sittai – per exempel el territori dil Calanda – ei restauss sil nivel dils onns avon. La concorrenza da luf, luf-tscherver e per part era digl uors ei il mument – mirau sur igl entir cantun ora – buca gronda, essend che quels animals seconcentreschan en emprema lingia sin animals curdai, malsaus e vegls.

Dapi onns caschunan las populaziuns da camuschs che sereduceschon fastedis. Tgei sto vegnir interpretu per frenar quella tendenza negativa?

Cun la catscha savein nus buca midar la massa. Ils davos onns ein entginas correcturas pertuccont il menaschi da catscha da camutschs vegnidadas fatgas. In dils gronds problems ei la tschoccardad da camutschs. Quella malsogna intervegn a moda marcanta enteifer las populaziuns. Co impedir quella malsogna san ins buca. Deplorablamein se-repeta ella en intervals da pauc onns. Il diember da camutschs sereducescha dil reminent dapi onns egl entir territori dallas Alps. En entgens territoris ei la reducziun schizun aunc pli massiva che tier nus. Probablamein ha quei era da far enzatgei cul disturbi. Pli baul havevan ils camutschs bia pli bia ruaus, sur-tut era igl unviern. Oz ein las activitads dils carstgauns – seigi cun turas, gianell-las ni parasguladers – bia pli intensivadas en quels loghens. Tenor miu manegiar ei il camutsch in animal fetg sensibel che reaghescha lu forsia cun malsognas sin quels disturbis.

L'Uniun cantunala dils catschadurs da patenta dil Grischun sa festivar il giubileum da 100 onns. Dat ei quella aunc en 100 onns?

Jeu pretendel ch'ei detti lu aunc ella. Igl ei semplamein aschia ch'ils catschadurs setegnan ensemen cura ch'ei fa da basegn. Avon 100 onns ei l'uniun vegnida fundada cun l'intenziun d'impedir la catscha da revier. Entochen oz eis ei reussiu da defender quels principis e quei vegn era ad esser il cass egl avegnir. Aschi ditg ch'ei dat la catscha da patenta dat ei era l'uniun. Sch'ils catschadurs ein units han els era in plaid el capetel dalla politica ed jeu creiel che negin vegli riscar da piarder quella pussonza. Nus havein denton era influenza ella cummissiun da catscha e consequentamein sil menaschi da catscha.

Cuort e bien

Num: Robert Brunold
Naschiu: 4 da december 1969
Domicil: Sursaiusa
Stadi civil: Maridau, bab da duas feglias (5 ed 8 onns).
Professiun: Fiduziari
Hobis: Catscha (pissiu), natira en general, leger, pesca, sittar.

Activitads en favur dalla catscha: 2004–10 president dalla Secziun da catschadurs Sursaiusa; 2007–13 president dalla reuniun dallas secziuns da catschadurs dalla Surselva; 2011–14 commember dalla suprastoza gronda dall'Uniun cantunala dils catschadurs da patenta dil Grischun; dapi ils 24 da matg 2014 president dall'Uniun cantunala dils catschadurs da patenta dil Grischun.

Clar na all'iniziativa encunter la catscha d'atun

Delegadas e delegai dall'Uniun cantunala dils catschadurs da patenta dil Grischun ein seradunai a Tavau

DA HANS HUONDER / ANR

■ L'Uniun cantunala dils catschadurs da patenta dil Grischun ha ina nova suprazion centrala e cun Robert Brunold da Sursaiusa era in niev president. Delegadas e delegai dallas secziuns da catschadurs dil Grischun han refusau claramein l'iniziativa encunter la catscha d'atun. La sonda vargada ei l'Uniun cantunala dils catschadurs seradunada a sia 100avla radunonza da delegai el Center da congress a Tavau. L'organisaziun dalla radunonza ei stada els mauns dalla Secziun da catschadurs Tavau, cun rund 260 commembras e commembers ina dallas grondas secziuns dall'uniun cantunala. Che la radunonza generala dils catschadurs ha giu liug uonn a Tavau ha giu in motiv special. Las secziuns da Tavau e Grischun central han numnadamein administrau ils davos sis onns l'uniun cantunala ed ein ussa seretratgas da quella incumbensa. Da niev semetta ina suprazion centrala cun commembras e commembers da differentas secziuns alla testa. Sin fundament dils statuts novs sto la suprazion centrala buca pli consistier mo da persunas dalla medema secziun. Alla radunonza a Tavau ein 216 persunas legitimadas da votar stadas presentas sco era numerus hosps. En siu davos plaid sco president cantonal ha Beat Angerer sutstriaieu la gronda lavur ch'els catschadurs prestan en favur dil spazi da viver dalla selvaschina. Igl onn vargau ein 25 000 uras da lavur vegnidas prestadas.

Robert Brunold al tgamun

L'uniun cantunala ha eligi Robert Brunold da Sursaiusa sco president e successur da Beat Angerer. 24 onns suenter la demission da Peter Janki da Vuorz sco president central ha la Surselva puspei ina persuna al tgamun dall'uniun cantunala. Vegni eligi en suprazion centrala ein era Noldi Tiri (Traversina), Nina Gansner-



Commembras e commembers dalla suprazion centrala ein vegni numnai commembers d'honor dall'uniun cantunala. Gabriela Huber (secunda da dretg), presidenta partenta dalla cummission da scolaziun e perfecziun, ei l'emprega dunna che daventa commembra d'honor dall'uniun cantunala. Dretg il president central partent Beat Angerer.

FOTO H. HUONDER

Hemmi (Purtenza), Marco Schnell (Falknis), Flurin Filli (Lischana) e Christian Kasper (Madrissa). Vegnius reeligijs ella suprazion centrala ei il president dalla cummission da tgira cantunala, Hansruedi Andreoli (Traversina). Alla suprazion cantunala gronda appartegnan plinavon ils presidents dils districts da catscha. Il president partent Beat Angerer vegn proponius al cantun per la tscherna ella cummission da catscha. Da niev ei vegniu scalfiu ina cummission da tir. Quella vegn ad esser responsabla egl avegnir per l'execuzion dallas directivas surordinadas pertuccont il tir da catscha dil singul catschadur. Seretratgs dalla suprazion centrala ein la sonda vargada sper Beat Angerer (president) era Gaudenz F. Domenig (vicepresident), Hannes Parpan (actuar), Martin Carigiet (cassier), Hanspeter Ambühl (capotiradur) ed Enrico Cola (menader dil

ressort mutaziuns). Sin fundament dalla structura nova dalla suprazion gronda ein era plirs commembers da quella d'entochen ussa seretratgs. Cun excepziun da Gaudenz F. Domenig ch'ei buca staus commember dalla suprazion centrala tuts sis onns ein tuts commembers da quella vegni numnai commembers d'honor. Niev commember d'honor daventa era Lorenz Casutt dalla secziun dalla Purtenza per ses grondas merets en favur dalla catscha.

Na all'iniziativa

Alla radunonza han las delegadas ed ils delegai era giu da sefatschentar d'entginas propostas che pertucan il menaschi da catscha. Aschia han els denter auter giu da prender in conclus concernent il temps dalla catsch'aula 2015. Sedecidi ein els per la variant cun l'interrupziun dalla

catscha dils 14 entochen ils 20 da settember. Sin gliesta da tractandas ei era la parola concernent l'iniziativa dil pievel encunter la catscha d'atun stada. Schebein e cura che quella vegn avon il pievel ei aunc buca decidiu. Cun 192 encunter 11 e treis abstenziuns han ils catschadurs refusau claramein quell'iniziativa. Ton Beat Angerer sco Robert Brunold ein stai satisfats dil resultat che muossa a moda evidenta co l'uniun cantunala patratga. Davart ils iniziants ni da quels che han beneventau l'iniziativa ha negin vuliu s'exprimer. La proposta dalla Secziun da catschadurs Sassauna da lubir ils treis davos dis dalla catsch'aula vadials tscharva, perencunter proteger vaccas e stiarlas, ei vegnida refusada claramein. Il president communal Tarzisius Caviezel ed il president dil cussegl grond, Hans Peter Michel, medemamein in vischin da Tavau, han purtau ils

salids dalla politica, ferton ch'il president dalla regenza e cau dil departament da baghegiar, traffic e forestaless, Mario Cavigelli, ei s'exprimius davart l'iniziativa encunter la catscha d'atun e l'iniziativa per restrenscher il menaschi da catscha ch'ei aunc buca vegnida inoltrada. «La catscha ei buca mo in hobi, moibein en emprema lingia ina incumbensa ed obligaziun. La regulaziun dalla selvaschina ei in'incarica a liunga vesta. Nus astgein buca selubir da negligir en quei connex per exempel igl uaul.»

Gie cun resalva al luf

Reinhard Schmidrig, cau dalla secziun selvaschina e biodiversitad tier igl Uffeci federal per ambient, ha medemamein priu sut la marella l'iniziativa. Las pretensiuns dils iniziants ch'il cantun Grischun cunterfetschi cun sia catscha d'atun al dretg federal ha el refusau. El appellescha als catschadurs da dar vinavon il fiug dalla tradiziun dalla catscha grischuna. Il cau digl Uffeci cantonal per catscha e pesca dil Grischun, Georg Brosi, ha tematisau en emprema lingia la preschientscha dil luf. El constatescha ch'il triep che viva il mument el contuorn dil Calanda ei ina concorrenza pils catschadurs. «Diesch entochen dudisch lufs basegnan rodund 250 animals selvadis d'ungla ni animals da casa annualmeins per surviver.» Tenor Georg Brosi sesurvescha il luf oravontut d'animals fleivels e giuvens: «Nus astgein dir gie al luf, denton cun mesira. Per haver l'acceptanza per quei animal vegn ina regulaziun ad esser necessaria baul ni tard.» Sco quei ch'il cau digl uffeci ha plinavon informau vegn introduciu uonn in niev sistem da registraziun dalla selvaschina sittada. Muort la fusiun da biaras vischnauncas eis ei necessari da precisar ils loghens nua ch'els animals ein vegni sittai. Tenor Georg Brosi vegn applicau da niev in sistem semegliont a quel dalla pesca.

«Proteger e promover quei ch'ei nies»

Simon Bundi ha referiu a Laax davart la historia dalla protecziun dalla patria el Grischun

■ (anr/hh) Danunder vegn l'idea dalla protecziun dalla patria e tgei cumpigliava quella pli baul? Sin quella ed autras damondas ha Simon Bundi, oriunds da Zignau, empruau da dar rispostas la gievgia sera. El referat ch'el ha teniu ella Casa de Mont a Laax ha Simon Bundi fatg in interessant excuors ella historia dalla protecziun dalla patria el cantun Grischun. Il referat presentau ei staus sia lavur da licenziat. Simon Bundi ha studiau historia generala, scienza da film e retoromanistica. Dapresent lavura el vid la dissertaziun concernent la historia dallas vischnauncas burgheisas. La protecziun dalla patria ha entschiet ditg avon la fundaziun dall'Uniun grischuna per la protecziun dalla patria igl onn 1905. «Gest ils costumes era enatzei vegl ch'ins apprezzava gia avon en Svizra, era sche negin era aunc vegnius sin l'idea da promover ni reactivar resti tradiziunal. Ins sto sedumandar, schebein igl ei insumma stau necessari da proclamar la protecziun dalla cultura veglia e la cuntrada, pia quei ch'ins sa numnar patria.» Cuort avon che l'Uniun grischuna per la protecziun dalla patria ei daventada realitad ei la Federaziun dalla protecziun dalla patria dalla Tiaratudestra vegnida fundada. Simon Bundi constatescha ch'els Grischuns han pli u meins copiau ils statuts da quella.

Grondas midadas

«L'intenziun principala dils fundatur dall'Uniun grischuna per la protecziun dalla patria era da daventar activa leu nua



Simon Bundi ha referiu a moda captivonta davart la protecziun dalla patria, en special el cantun Grischun da 1850 entochen l'emprega uia mundiala.

FOTO H. HUONDER

ch'ei vegneva baghegiu enatzei che mava buca a prau cun l'architettura veglia da nossas regiuns e nua ch'ei vegneva fatg empaglia la cuntrada», constatescha Simon Bundi. Els onns alla fin dil 19avel e l'entschatta dil 20avel tschentaner eran las midadas ella cuntrada ed els viters in ton pli grondas ch'oz. Els loghens turisticis ein grondas hotels vegni construïu. Ei deva denton era plans per viasfier e pendularas, pia construcziuns cun influenza sin il maletg dalla cuntrada. «Ils Svizzers han buca inventau la protecziun dalla patria. Gia el 19avel tschentaner deva ei ell'Engeltiara teoretichers sco John Ruskin che levon reformar l'architettura tenor igl ideal dalla casa da purs», di Simon Bundi. Fuormas e materials da construcziun stuevan ir a prau cun la cuntrada, alla moda da viver dils habitonts e dil clima. Adherents dalla protecziun dalla patria el Grischun propagavan per quei motiv il lenn

sco material principal da baghegiar. La fuorma dil tetg dallas casas stueva corrispunder al profil dils cuolms, las finiastras pintgas duevan buca schar mitschr memia bia calira e la gronda dil tetg schurmegiava la fassada e la pluna lenna. «Sch'ins baghegiava ina casa tenor quls criteris deva quei tenor ils protecturs dalla patria en Svizra ed el Grischun ina biala casa», di Simon Bundi.

Il profil dils cuolms

Gia dapi plirs tschiens onns sebasea quei ch'ei tipic svizzer sin dus grondas elements, numnadamein la cultura dils antenats ed ils cuolms, en special las Alps. Simon Bundi alleghescha entgins exempels, respectivamein simbols sco ils purs heroxs, Wilhelm Tell, il senn da libertad ed independenza, sunar tiba ni concorrenzas da lutgar, mo era il maletg ch'els turists havevan dalla Svizra cun sias cuntradas alpinas

e puras en costumes tradiziunals. «Ins vesa pia ch'els antenats e lur vertids, lur prestaziun per defender la tiara, lur cultura e moda da viver ed era ils cuolms sco simbol per la patria svizra vegnevan apprezzai gia avon ch'ei ha dau l'idea dalla protecziun dalla patria», accentuescha Simon Bundi. Els iniziants dall'uniun per la protecziun dalla patria eran dil meini che quellas bellezias dalla patria seigien vid igl ir a piarder ed ins era dil meini ch'il pievel hagi piars il senn pil bi e bien. «La valeta ch'ins deva alla cultura dils vegls era aschi ferma che la protecziun dalla patria criticava enseset tut quei ch'era auter, oravontut quei ch'era modern. Ina casa sco quella cun tetg plat vegneva buca mo criticada perquei ch'ella veva in'otra fuorma che quei che valeva sco architettura tradiziunala en Svizra. Nus vesin cheu bein ch'ins argumentava ch'ei maunchi al modern tut il bien dil vegl: Material e fuormas che tegnan ditg, pia valurs quasi eternas. Ins schazegia numnadamein quei ch'ei vegl ed ha teniu ditg, pertgei ins manegiava – e manegia per part aunc oz – ch'els Svizzers hagian aunc adina in senn per libertad ed independenza sco Wilhelm Tell e Winkelried. Pia: Per esser enatzei endretg sto ei tener ditg», constatescha Simon Bundi. En quei senn han ils adherents dalla protecziun dalla patria era defendiu lur interess tier sanaziuns da baghetgs vegls, sco per exempel capluttas ni il vitg da Guarda ell'Engiadina. Aschia han els buca saviu magunar che tetgs da slondas ein vegni remplazzai d'alters materials. En quei temps dalla conjunctura aulta dalla protecziun dalla

patria ha era il romontsch sentiu ina nova identitad. Peider Lansel ha nezegiau quei svilup per dar novs accents all'impurtonza dil romontsch. Quei moviment ha la fin finala gidau a procurar ch'il romontsch daventi lungatg nazional.

Iniziants han priu influenza

Tenor Simon Bundi eran ils architects che han formau da gliez temps ils grondas projects ed ils projects da prestige dil 20avel tschentaner el Grischun architects dil stil dalla patria. «Quei muossa che la protecziun dalla patria ha saviu figar pei cun sias ideas», di Simon Bundi. Exempels persuerter ein il baghetg dallas ovras electricas a Cuvlignas ni il baghetg digl onn 1911 dalla Banca Cantunala Grischuna a Cuera. Auters exempels furnescha la Viafier retica. Achilles Schucan da Zuoz, in commember dall'uniun, ei staus empredirectur dalla Viafier retica. Muort a sia simpatia per la protecziun dalla patria ein biars baghetgs da staziuns e punts vegni realisai tenor quei ideal. Per francar sias ideas ella populaziun s'engaschava l'Uniun per la protecziun dalla patria dil Grischun era en favur da grondas fiastas. Aschia eis ella segidada ella finanziaziun dils costumes per il til ed il cudischet dalla fiasta da giubileum da 500 onns dapi la renovaziun dalla Ligia Grischa igl onn 1924 a Trun. Il referat da Simon Bundi a Laax ei vegnius organisau da Carin Coray dil Center da cultura, lungatg e formaziun Surselva. David Flepp dalla Lia Rumanstsch ha fatg l'introducziun alla presentaziun da Simon Bundi.